

# Las proximas trais emnas decidan

Gieus olimpics 2022

(rtr) Sch'i vegniss votà ussa schessan 45% na a Gieus olimpics d'enviern en il Grischun; 42% schessan gea. Quai resulta da la segunda retschertga represchentativa da l'institut DemoSCOPE per in-




cumbensa da «Radiotevisiun Svizra Rumantscha», dal «Regionaljournal Graubünden» e da la «Südostschweiz». Cumpareglia cun l'emprima retschertga dal november passà han ils ad-

versaris gudagnà 2% ed ils adherents han pers 1%. Tras la toleranza da la statistica da +/-3,1% èsi e resta però vinavant fitg stretg. En egl dat dentant che blers svilups mussan plitost engiu.

## Il center politic en la zanga dals pols

Tar ils electurs e las lecturas da la Partida socialdemocratica ps e da la Partida populara svizra pps è il na vegnì anc pli cler. Tar la ps din ussa 71% (+10%) na e tar la pps èsi 55% (+1%). Tar las autras partidas resulta anc adina in gea.

Il pli cler èsi tar la Partida liberaldemocratica pld che di gea cun 71% (+15%) e la Partida cristiandemocratica pcd cun 54% (+8%). Anc adina in gea resulta tar la Partida burgais-democratica pbd cun 48% dentant in gea pli flaivel (-10%).





## In foss tranter il sidost ed il nord

La pli gronda acceptanza chattan ils gieus olimpics en las valladas dal sid cun 65% (+8%). Ed en il Partenz ha l'opiniun schizunt midà en in plus: Ussa schessan 48% (+13%) gea als gieus e mo pli 44% (-8%) schessan na.

En l'Engiadina va l'acceptanza dentant enavos. Cun 46% (-6%) è quella pli flaivel ch'il november vers il na ch'è creschì a 42% (+5%).

Da l'autra vart èn las regiuns Surselva e la Val dal Rain posteriur, ch'èran anc en in pari il november, glischnadas en in na: La Surselva schess na cun 48% (vers 39% gea) e la Val dal Rain posteriur cun 47% (vers 37% gea).

Ed en ils districts Landquart e Plessur è il na s'intensivà. Uss avessan 54% (+5%) ditg na als gieus e 34% (-3%) avessan ditg gea.



## Perdita era tar la populaziun affina al sport

Tar las 1000 persunas intervistadas han 70% inditgà dad esser affinas al sport – pia ch'i fan sezs sport d'enviern u ch'i han ina relaziun cuntut. Da questas persunas han mo anc 45% (-3%) ditg gea a la candidatura. Da l'autra vart ditg na questa giada han cun 45% (+4%) dapli persunas

## Detagls e metoda da la retschertga

Sin incumbensa da Radiotevisiun Svizra Rumantscha, dal Regionaljournal Graubünden e da la Südostschweiz ha l'institut per la perscuraziun d'opiniuns DemoSCOPE (Adligenswil) fatg 1000 intervistas da telefon cun persunas cun dretg da votar en il Grischun (cumprais las valladas dal sid da lingua taliana). Quai dals 21 da schaner fin ils 6 da favrer 2013.



Per garantir che la retschertga saja represchentativa èn chasadas privatas vegnidas seleziunadas tenor il princip da la casualità. Las respostas èn vegnidas valitadas sin basa da la structura da la populaziun e las elecziuns dal cussegl nazional dals 2011.

La toleranza da sbagls è tar maximalmain +/-3,1%.

## Economia cunter ecologia



Sco raschun principala inditgeschan ils adherents cler la speranza da novs impuls per il turissem, impuls per l'economia grischuna en general e surtut la reclama per il Grischun. Sco nov argument tar ils adherents cumpara uss en la segunda retschertga il curaschi e la schanza da far ils gieus.

Tar las raschuns cunter ils gieus en il Grischun prevalan anc adina ils arguments ch'èsi sajan memia chars, memia gronds per il Grischun e betg persistentes. Nov argument qua è la critica che mo paucs profitassan da quests gieus, uschia ch'i fissia da reparter els sin plirs lieus.



## Opiniuns paran fatgas tar um e dunna, giuven e vegl

Pauc moviment hai dà en las categorias demograficas. Anc adina èn las dunnas cler tar in na, sco era ils umens cler tar in gea. E tar la vegliadetgna vala er anc adina: ils giuven èn persuerter, ils vegls èn encunter.



## Tendenza anc adina plitost na

Era la segunda unda d'intervistas n'ha betg purtà a Werner Reimann da DemoSCOPE segirtad. Guardà sur tut resultia relativamain pauc moviment, sco quai ch'el ha explitgà envers RTR. I dettia dentant dapli indizis per in na. Quai resguardond ils svilups negativs en las regiuns cun blera populaziun e l'accentuaziun dals pols.

En vista a la votaziun dals 3 da mars 2013 n'èsi tenor Reimann però betg pussaivel da far ina prognosa.